



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL

Sumáriu Kazu

Períodu : Dezembru 2012

Edisaun : 19 Dezembru 2012

Sumáriu prosesu julgamentu iha Tribunál Distritál Baucau semana premeíru fulan Dezembru 2012

Introdusaun

Iha 4 Dezembru 2012 JSMP kontinua hala'o aktividade monitorizasaun iha Tribunál Distritál Baucau.

Ba edisaun ida ne'e, JSMP la produz sumáriu ne'ebé kompletu hanesan normal tanba iha komitmentu institusionál seluk ne'ebé hala'o iha Dili no tanba mos tribunál sira tama ona ba feriadu anual setór justisa nian.

Tanba ne'e, ba edisaun ida ne'e, ami so bele konsegue halao monitorizasaun lora ida deit, iha lora refere, JSMP konsege rejista total kazu 3 ne'ebé, kompostu husi kazu krime danu ho violénsia 1 no kazu krime violénsia doméstika hamutuk 2. Entre kazu tolu (3) ne'e hotu-hotu hetan ona desizaun finál.

Hanesan edisaun sira seluk sumáriu ida ne'e mai ho objetivu atu habelar informasaun ba lala'ok julgamentu iha Tribunál Distritál Baucau.

Tuir mai deskripsaun sumáriu julgamentu kazu kompletu:

1. Kazu krime danu ho violénsia Nú. 120/Crm.C/2012/TDB

Iha 04 Dezembru 2012 Tribunál Distritál Baucau halao julgamentu leitura akordaun ba kazu krime danu ho violénsia ne'ebé involve arguidu Paulino Cabral hasoru Estadu (PDHJ) no vítima Filomeno Paulo Fatima Martins. Kazu ne'e rejista iha tribunál ho Número Prosesu: 120/Crm.C/2012/TDB.

Kazu ne'e akontese iha 17 Abril 2012 iha Suku Macadique, Sub-distritu Uatulari Distritu, distritu Viqueque.

Audiénsia julgamentu prejide husi juis singulár Dr. António Fonseca Monteiro, Ministériu Públiku representa husi Dr. Pascasio de Rosa Alves no arguidu hetan defeza husi Dr. Gil Amaral hanesan advogadu estagiariu.

Ministériu Públiku duun/akuza arguidu nu'udar autór material ba kazu krime danu ho violénsia ne'ebé preve iha artigu 260 Kódigu Penál ho pena prisaun tinan 4 to'o tina 12.

Bazeia ba prosesu ne'ebé hala'o tribunál prova katak iha 17 Abril 2012 arguidu ho grupu ida hapara tiha kareta PDHJ. Arguidu hateten ba vítima no testamuña katak ofisial CNE sira mak sura sala rezultadu elisaun nune'e sira nia partidu lakon iha elisaun.

Tribunál mos prova katak arguidu ho katana taa rahun tiha vidru odamatan husi parte xofer, hodi fatuk tuda rahun vidru odamatan parte sorin karuk no kontinua hodi aú baku rahun vidru kareta oin.

Arguidu nia hahalok ne'e hamosu prejuizu ba estadu RDTL ho valor material hamutuk US\$. 4.376,83 no kauza vítima kanek iha parte tilun.

Depoide tribunál halo avaliasaun ba faktus no situasaun tomak durante julgamentu, tribunál konklui hodi kondena arguidu ba pena prizaun tinan 6 no selu indemnizasaun sivíl hamutuk US\$. 4.376,83 ba estadu.

2. Kazu krime violénsia doméstika Nú. 142/Crm.S/2012/TDB

Tuir mai iha 04 Dezembru 2012, Tribunál Distritál Baucau kontinua hala'o julgamentu ho agenda leitura sentensa ba kazu krime violénsia doméstika ne'ebé rejista iha tribunál ho Número Prosesu: 142/Crm.S/2012/TDB.

Kazu ne'e involve husi arguidu Alberto de Jesus Lopes hasoru nia aman Armindo Lopes. Kazu ne'e akontese iha 20 Janeiro 2012 iha Suku Maina I, Sub-distritu Lautem, Distritu Lautem.

Julgamentu ba kazu ne'e prejide husi juis singulár Dr. José Gonçalves, Ministériu Públiku reprezenta husi Dr. Baltazar Ramos no arguidu hetan defeza husi Dra. Cristina da Silva hanesan advogadu estagiariu.

Iha audiénsia julgamentu ne'e tribunál konvensidu katak arguidu provadu komete krime violencia domestika hasoru vítima. Aktu ne'e realizadu liu husi tuku dala ida iha vítima nia matan parte loos no hodi katana taa vítima maibé la kona vítima tanbá vítima hakruuk.

Bazeia ba faktu provadu sira ne'ebé tribunál produs, ikus mai tribunál konklui hodi kondena arguidu ho pena multa ho valor US\$ 45.00 durante loron 90 nia laran. Pena multa ne'e sei selu US\$. 0,50 sentavus kada loron. Tribunál mós fiksa pena alternativu ba arguidu katak sé arguidu la kumpri pena multa ne'ebé tribunál fiksa ona, tribunál sei kondena arguidu ho pena prizaun loron 60.

3. Kazu krime violénsia doméstika Nu. 145/Crm.S/2012/TDB

Aleinde ne'e, iha 04 Dezembru 2012, Tribunál Distritál Baucau hala'o julgamentu ho agenda leitura sentensa ba kazu krime violénsia doméstika ne'ebé rejista iha tribunál ho Número Prosesu

145/Crm.S/2012/TDB. Kazu ne'e involve husi arguidu Bemvindo Ximenes Freitas hasoru nia kónjuje Rofina Ana Ximenes.

Kazu ne'e akontese iha loron 10 Jullu 2012 iha aldeia Uaimanube, Suku Uailili, Sub-distritu Baucau, Distritu Baucau.

Dr. António Fonseca nu'udar juis singulár ne'ebé prejide julgamentu ne'e, Dr. Baltazar Ramos reprezenta Ministériu Públiku no arguidu hetan defeza husi Dr. Paulino da Costa Alves hanesan advogadu estagiariu.

Ministériu Públiku akuza arguidu nu'udar autór matérial ba krime ofensa ba integridade fízika simples ho natureza violénsia doméstika ne'ebé preve iha artigu 145 Kódigu Penál konjuga ho artigu 35 Lei Kontra Violénsia Doméstika.

Iha julgamentu ne'e tribunál prova katak arguidu deskuti malu ho vítima no sem justifikasaun arguidu tuku no tebe dala barak iha vítima nia isin loloon ne'ebé kauza vítima sofre moras, bubu no kanek iha nia isin loloon.

Depoisde avalia prosesu no situasaun tomak tribunál konklui hodi kondena arguidu ho pena prisaun fulan 6 no suspende ba tinan 1.

Atu hetan informasaun kle'an favor kontaktu diretamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Landline: 3323883 / 77810637
www.jsmp.tl